



FRANCISCO CARBALLO (1925-2014)



Copyright de Xan Carballa

CONCELLERIA DE CULTURA



CONCELLO DE
MACEDA

FRANCISCO CARBALLO (1925-2014)

Nacido o 8 de marzo de 1925 no lugar de Celeirón (parroquia de Asadur, Maceda - Ourense). O cuarto de sete irmáns (4 homes e 3 mulleres). Lembraba a súa infancia como inocencia, xogo e escola á que foi aos 5 anos; fixo a 1ª comuñón aos 6. Montou a cabalo dende sempre, porque o levaban de neno e sabía montar dende os 3 anos. Foi unha infancia divertida; a escola tenra; as feiras de Maceda os 4 e os 20, unha ilusión; os xogos na "carreira" continuos; a familia, un fogar entretido. Perdeu, por falecemento, a irmá maior cando tiña el 7 anos: foi moi amargo. Aos 11 anos pediu estudar nos Milagres -un santuario con preceptoría a 6 km. da casa. No 2º curso, no verán, faleceu seu pai: moi duro trance. Seguiu estudos. Aos 16 anos optou por un noviciado de paúles. 4 anos en Madrid máis 4 en Cuenca no máis puro "nacionalcatolicismo". Internado filosófico atroz. O teolóxico resultou amábel. Presbítero aos 24 anos (3 de xullo de 1949).

Profesor de seminario -cursos de Filosofía- e estudiante de Historia na Complutense (Madrid). Licenciado en 1954 con sobresaliente. Iniciou o doutorado a compatibilizar como director do colexio San Narciso de Marín, (1954-1958). Logo director en Barakaldo (1958-1965). No 1965 reitor do teologado de paúles en Salamanca. Renovación teolóxica ao ar do Concilio Vaticano II. Así 8 anos decisivos para mudar de mentalidade.

No 1973 decidiu voltar ao País. Vigo como domicilio; profesor da E.U. de Maxisterio e horas no Politécnico. Profesor e animador cultural, político e relixioso. Actividade relixiosa na Igrexa galega dos "Coloquios", de Irimia, etc. En Vigo había cregos obreiros e con eles viviu. Actividade cultural directa no barrio de Lavadores e na Asociación Cultural de Vigo que presidiu varios anos. Cofundador e presidente de Promocións Culturais Galegas (1977), editora d'A Nosa Terra. En política tomou parte na AN-PG e logo no BNG. Como escritor comezou en revistas relixiosas nos anos 1946-49. Logo publicou *O Santuario do Monte Medo*, que se esgotou nos anos 60. Ademais dos libros referidos na bibliografía, en Salamanca editou outros dous. Ten varias monografías en números extra d'ANT, ensaios en revistas internacionais. Escribiu semanalmente no periódico ANT recensións de libros e columnas de opinión.

Desvelou a súa interioridade en *Conversas con Francisco Carballo* (ANT, 2002), obra de Santiago Prol e Xan Carballa. A esas conversas se remite. Toda a súa actividade estivo sempre arredor da historia, da reflexión teolóxica e do vivir dun galego crente. Amou a montaña, o mar, o silencio das noites de luar e os días de choiva quente. Nos artigos en ANT e outros medios, procurou combinar pensamento e bo expresar, gañindo consciencia da lingua galega na que militou e quixo usar con rigor e estilo. Conservou o diario de melancolía e soños desde os 16 anos que aos 60 botou ao lume; gardou algo dos anos 1963 e seguintes. Nos anos 90 redactou unhas *Memorias* que serviron a S. Prol e X. Carballa para as *Conversas*; de vez en cando proseguíunas.

Viviu no Morrazo dende que se xubilou como profesor. Compartiu casa con paúles; estivo activo: ministerialmente coa pequena Igrexa galeguizada de Irimia; culturalmente, con colectivos, v.g. Fundación Joan Maragall, Maio Longo (Pontevedra), Pedra Longa (Marín), ANT e outros; intencionalmente, co BNG. Gustou da investigación e aceptou o ensaio como diálogo cos lectores. Como historiador publicou media ducia de libros capitais para a nosa memoria e unha ducia como coautor. Colaborou en A Trabe de Ouro, Seiva, Confer, Encrucillada, Anales C.M., Cadernos de Cultura ANT, etc. Escribiu semanalmente en ANT; periodicamente en A Peneira e ocasionalmente na prensa en xeral. Investigou sobre a Galiza Moderna e Contemporánea. Finou en Salamanca o 29 de novembro de 2014. Está soterrado na campa de Asadur (Maceda). Hogano a Asociación Amigos de Francisco Carballo mantén acesa a chama da súa memoria, mesmo coa bitácora www.fcarballo.blogspot.es

Fonte: Autobiografía de Francisco Carballo (www.aelg.gal)

COLOCACION DA PLACA NA PRAZA FRANCISCO CARBALLO DE MACEDA

14 de setembro ás 13 horas coa seguinte programación:

Intervención de Santiago Prol, Presidente da Asociación de Amigos de Francisco Carballo.

Descubrimento da placa.

Intervención do Sr. Alcalde de Maceda, Rubén Quíntas Rodríguez.

Actuación da Banda de Gaitas de Maceda durante o acto.
